

# La via tras in labirint è sco la vita

■ **(anr/vi) Daniel Monn ha fatg in labirint en la baselgia S. Felix e Regula a Turitg. Il labirint è per meditar. L'assistent pastoral ha raquintà a l'anr ch'ìls labirints erian pli baud fitg derasads.** Fitg simpel è el fatg, il labirint. Ensemen cun scolars ha Monn tatgà giun plaun bindels da colla. Quels furman ils urs da la via dal labirint. La via è lunga. Da l'entrada da la baselgia maina ella tranter las retschas da bauns ora vers l'altar. Lura fa la via in caraun, lura puspè in caraun e puspè in. Uschia passan ins en crusch e travers tras la baselgia. Pliras giadas van ins sper l'altar ora e sa volva puspè enavos vers las alas stgiras da la baselgia. Circa tschintg minutas èsi dad ir. Igl è curios da «spassegjar» uschè ditg tras ina baselgia nua ch'ins na va normalmain betg a palandrond. Il davos arriivan ins en il center dal labirint – avant l'altar. Là dastgan ins pussar u meditar in mumenet, sch'ins vul.

## In labirint n'è betg in «Irrgarten»

Ils uffants hajan gì tschaffen da far il labirint, di Monn. I n'è betg l'emprima giada ch'el sa fatschenta cun labirints. A Neuchâtel, nua Monn ha passentà in onn en claustera, ha el gì da sajar in pastget. «Daco adina be sajar giu tut?» è el sa dumandà. El ha sajà vias en il pastget fin ch'igl è stà in labirint. Quel ha pla-

schì uschè bain als paders ch'els han mantegnì el fin oz.

Il labirint en la baselgia a Turitg na vegn betg a «surviver» uschè ditg, ma intginas emnas resta el anc per terra.

«In labirint n'ha dal reminent naginas vias che mainan en errur», declera Monn. Ozendi scumbiglian ins savens il labirint cun il «Irrgarten». In labirint classic haja be ina via che maina en il center.

## La metamorfosa en il labirint

Labirints hajan ina tradiziun en il cristianissem. Pli baud avevi blers labirints en las baselgias. Empè da far in lung pelegrinadi, gievan ils cartents tras il labirint.

La tradiziun saja ida en emblidanza la fin dal temp medieval. Ins haja destrui il labirints, damai ch'ins n'enconuschevia betg pli lur muntada, raquinta Monn.

En in labirint van ins vers il center. Tgi che chatta il center, chatta sasez e Dieu enina. Il labirint envida da tschertgar sasez e sia atgna originalitad. In labirint mussia ad ins che la tschertga na maina betg adina direct en il center e tar la soluziun. I dovra bleras stortas per cuntanscher la finamira. Sin via fa mintgin atras ina metamorfosa, ins po era numnar quai in svilup – sco ina poppa-insect che daventa tgiralla.

